

5-§. Asosiy vositalarni qayta baholash

24. Asosiy vositalarni qayta baholash — asosiy vositalar qayta tiklash qiymatini hozirgi bozor narxlari darajasiga muvofiqlashtirish maqsadida ularni vaqti-vaqti bilan aniqlashtirishdir.

25. Asosiy vositalar qayta baholash natijasida hisob va hisobotda joriy qiymat bo'yicha aks ettiriladi.

Asosiy vositalarning boshlang'ich qiymati qayta baholanishi mumkin (shu jumladan, O'zbekiston Respublikasi Hukumati qarorlari bo'yicha vaqti-vaqti bilan).

26. Asosiy vositalarning boshlang'ich (qayta tiklash) qiymati qayta baholanganda qayta baholash o'tkazilgan sanadagi ularning jamlangan amortizasiyasi asosiy vositalarning boshlang'ich (tiklash) qiymati o'zgarishiga mos indekslariga tuzatiladi hamda keyingi hisoblanadigan amortizasiya qayta baholangan qiymat hisobidan amalga oshiriladi.

27. Asosiy vositalar indeksasiya yo'li bilan yoki rasmiy tasdiqlangan bozor narxlari bo'yicha bevosita qaytadan hisob-kitob qilish orqali qayta baholanadi.

Qayta baholash natijasida asosiy vositalarning bahosini o'sishi summasi rezerv kapitali tarkibiga «Uzoq muddatli aktivlarni qayta baholash bo'yicha tuzatishlar» schyotiga olib boriladi.

Qayta baholash natijasida asosiy vositalarning bahosini pasayishi summasi «Uzoq muddatli aktivlarni qayta baholash bo'yicha tuzatishlar» schyotiga rezerv kapitalining mazkur ob'yektning avvalgi hisobot davrlarida o'tkazilgan bahosini o'sishi summasi doirasida kamayishiga olib boriladi. Ob'yektning bahosini pasayishi

summasi uning bahosini o'sishi summasidan oshishi boshqa operasion xarajatlarga olib boriladi.

28. Asosiy vositalarni qayta baholash natijalari moliyaviy hisobotda asosiy vositalarni qayta baholash amalga oshirilgan joriy davrda aks ettiriladi.

Hisobot yilining birinchi sanasi holati bo'yicha o'tkazilgan asosiy vositalarni qayta baholash natijalari buxgalteriya hisobida aks ettirilishi lozim. Qayta baholash natijalari avvalgi hisobot yilidagi moliyaviy hisobot ma'lumotlariga kiritilmaydi, balki hisobot yili boshiga moliyaviy hisobot ma'lumotlarini shakllantirishda qabul qilinadi. Bunda o'tgan yil yakuni va hisobot yili boshidagi ma'lumotlarning mos kelmasligi hisobot yilining birinchi sanasi holati bo'yicha o'tkazilgan asosiy vositalarni qayta baholash natijasi sifatida tushuntiriladi hamda joriy davr moliyaviy hisobotiga tushuntirish xatida bayon etiladi.